

clarissimum vocat, atque illustrissimum; atque etiam Eusebium, qui virum illustrem laudans, ipsum quoque sæpe cum honore citat; quos omnes pariter Blount, ad Diodori commendationem, retulerat. Testimonium, quod nuperus Scriptor Gallus de Diodoro profert, vel potius testem, non testimonium, aut in libris illis, quos deperditos lugemus, aut in apocryphis aliis, quos nullius roboris ducimus, fortassis fuisse, existimamus.

§. X.

Ambrosio Calepino, aliisque, sive veteribus, sive recentioribus, de re nostra scribentibus, quæ fides, & quæ auctoritas, tribuenda, ostenditur.

Ambrosius Calepinus, notissimus Scriptor, quem non tantum opera, quæ omnium manibus teruntur, apprime laudant, verum quoque latissime commendant, & linguæ hominum, quas erudit, & voces rerum, quas illustrat; Brutæ tamen genti nostræ parum aut nihil se gratiosum esse probavit. Nescimus, an ex ingenio suo scripserit, an ex aliorum invidia, atque livore; hoc tamen nobis certissime constat, & ea objectasse contribulibus nostris, quæ olim vulgi ore opponebantur, & illa etiam, quæ usque tunc nullus hominum commentus fuerat. Et nomen fœdat, & gentem dehonestat; itaut parum illi fuisset homines ex moribus offendere, si ex vocabulis etiam non læsisset. Convicia pro conviciis non reddimus; etsi possemus homini Bergomensî, quæ in Brutios homines acuit,